

БӨЛІМ: АБАЙ ҚҰНАНБАЙҰЛЫ / ӨЛЕҢДЕР

## Абайдың баласы Әкімбайдың жоқтауы

ЖАРИЯЛАНДЫ  
20.01.2023ТІРЕК СӨЗДЕР  
Абай, Абай ҚұнанбайұлыСІЛТЕМЕ  
<https://bilimger.kz/129359/>

### Абайдың баласы Әкімбайдың жоқтауы

Көз жұмғанша дүниеден  
Иманын айтып кеткен-ай!  
“Бейсенбі ме бүгін?” — деп,  
Жұмаға қарсы өткені-ай!  
Жер күңіреніп, жұрт шулап,  
Ағайын түгел жеткені-ай!  
Жамиғат тоңбай күн жылып,  
Тәңірім рақым еткені-ай!  
Ием қабыл алды-ақ деп,  
Көңіліме қуат біткені-ай!  
Қуаттанып бақсам да,  
Күнәлі нәсіп түтпеді-ай.  
Ата тегі мұндағы—  
Орта жүздің ұлығы;  
Ана тегі ондағы —  
Өзен судың тұнығы.  
Екі асылдан қосылған  
Сом алтынның сынығы.

Өлгенше естен қалмайды  
Өзгеше біткен қылығы.  
Қызыл балақ, қыранның  
Балапанын дерт алды.  
Жеміс ағаш, бәйтерек  
Балдырғанын өрт алды.  
Артына белгі тастамай,  
Жал құйрығын келте алды.  
Ағайынды тойғызбай,  
Аз күн қоймай, ерте алды.  
Көп жасамай, көк орған,  
Жарасы үлкен жас елім.  
Күн шалған жерді тез орған,  
Күншіл дүние қас өлім.  
Артына белгі қалдырмай,  
Бауыры қатты тас өлім.  
Жыламайын десе де,  
Шыдарлық па осы өлім?  
Орамды тілді ауыздым,  
Ақылға жүйрік маңыздым,  
Көп жасамай тез кетіп,  
Көзімнің жасын ағыздың.

Абай Құнанбаев

**ҚМ АА** Куәлік нөмірі: **KZ45VPY00102718** — ҚР Мәдениет және Ақпарат министрлігі

© 2026 **Bilimgger.kz** Ақпараттық-танымдық білім порталы. Барлық мазмұн авторлық құқықпен қорғалған.